

<i>Dependencia</i> CIR.- Servizo de Circulación e Seguridade Cidadá 317.- MMOBE		
<i>Documento</i> CIRXI1T4	<i>Expediente</i>	<i>Fecha</i> 25-11-13 14:13

Asunto
**NORMAS ACTIVIDADES ARTÍSTICAS NA VÍA
PÚBLICA**

Interesado y Localización de la Actividad
**CONCELLERIA DE MOBILIDADE, SEGURIDADE CIDADADA E
TRAFICO**

15078DCIRXI1T4U
² 15078DCIRXI1T4U£ »
² 15078DCIRXI1T4U£ »

DECRETO.- Santiago de Compostela, 25 de novembro de 2013

1.- A Disposición Final Primeira da Ordenanza Municipal de Actividades, Instalacións e Ocupación da Vía Pública establece que:

En aplicación desta normativa, a Alcaldía, ou a Concellería delegada competente, ditará as resolucións que procedan para garantir o seu correcto cumprimento e completar o seu obxecto con maior detalle.

En desenvolvemento do disposto no artigo 109 e ss. da Ordenanza Municipal de Actividades, Instalacións e Ocupación da Vía Pública, esta concellería ten elaborado unhas normas que rexirán nas autorizacións da celebración de actividades artísticas na vía pública promovidas por particulares.

Para xeral coñecemento das mesmas as normas se publicaran na páxina web do Concello.

Asemade, para facilitar a xestión das autorizacións que os particulares teñen que solicitar esta concellaría levará a cabo a elaboración duns impresos ós que poderán acceder os particulares, tanto nos Rexistros Municipais coma na páxina web do Concello.

III Ao abeiro do disposto no artigo 124.4.ñ) da Lei 7/85 de RBRL na redacción dada pola Lei 57/2003 de medidas para a modernación do goberno local e a Lei 4/2004 do 28 de xuño do Parlamento de Galicia, que establece no seu artigo 1 a aplicación ó Concello de Santiago do disposto na lexislación estatal, anteriormente sinalada, o Alcalde é competente para dictar a resolución que se interesa. Asemade, de conformidade co disposto no artigo 124 da Lei 7/85 na redacción dada pola Lei 57/03, por acordo de 26 de febreiro de 2013, o Alcalde delega no concelleiro que asina a competencia que se interesa

Visto o exposto nos parágrafos anteriores; así como na Lei 7/85 de 2 de abril Reguladora das Bases de Réxime Local modificada polas Lei 11/99 do 21 de abril e na Lei 57/2003 de 16 de decembro de medidas para a modernación do goberno local e demais normativa de aplicación, especialmente o disposto na Ordenanza Municipal de Actividades, Instalacións e Ocupación da Vía Pública.

RESOLVO:

<i>Dependencia</i> CIR.- Servizo de Circulación e Seguridade Cidadá 317.- MMOBE		
<i>Documento</i> CIRXI1T4	<i>Expediente</i>	<i>Fecha</i> 25-11-13 14:13

APROBAR as Normas Reguladoras da Realización de Actividades Artísticas na Vía Pública Promovidas por Particulares, que se adxunta a esta resolución.

Notifíquese o presente decreto ós interesados e ós demais negociados, seccións e servicios correspondentes.

O CONCELLEIRO-DELEGADO DE MOBILIDADE, SEGURIDADE CIDADÁN E TRÁFICO

Asdo/ Luis García Bello

NORMAS REGULADORAS DA REALIZACIÓN DE ACTIVIDADES ARTÍSTICAS NA VÍA PÚBLICA PROMOVIDAS POR PARTICULARES

DISPOSICIÓN 1ª.- ÁMBITO DE APLICACIÓN

Estas normas aplicaranse ás autorizacións de actividades de natureza diversa mais de índole artística ou cultural que se realicen na vía pública municipal, que sexan promovidas por particulares e que non supoñan o exercicio dunha actividade mercantil directa nin a prestación lucrativa de ningún servizo, ao abeiro da Ordenanza municipal de actividades, instalacións e ocupación da vía pública.

DISPOSICIÓN 2ª.- ACTIVIDADES AUTORIZADAS

As actividades susceptibles de autorización serán as relacionadas a seguir, cos requisitos que especificamente se sinalan para cada unha delas na disposición 9ª e atándose ao número máximo previsto en cada localización segundo as determinacións do anexo 1 destas normas.

Con carácter xeral, poderanse autorizar actividades consistentes en actuacións musicais, pictóricas ou outras actividades artísticas como estatuas viventes, mimos etc. Calquera actividade artística que promovan os particulares na vía pública será sometida previamente á valoración da súa oportunidade.

O incumprimento das condicións citadas poderá dar lugar á retirada inmediata do posto ou á suspensión da actividade, sen prexuízo das sancións legais que puidesen corresponder logo da tramitación do expediente que cumpra.

DISPOSICIÓN 3ª.- PERÍODO DE OCUPACIÓN E HORARIO AUTORIZADOS

Tanto o período de ocupación como horario permitido para o exercicio da actividade determinaranse no seu momento de forma individualizada nas correspondentes autorizacións, dentro das limitacións previstas na disposición 9ª destas normas.

DISPOSICIÓN 4ª. - INSTALACIÓNS

Calquera elemento ou instalación auxiliar que pretenda situarse na vía pública e que sexa preciso para o exercicio das actividades recollidas nestas normas será de natureza desmontable, sen que se poida ancorar ou fixar de ningunha forma ao pavimento, a edificios ou a elementos do mobiliario urbano.

Na instalación de calquera elemento auxiliar necesario para o desenvolvemento da actividade esixírase protexer a beirarrúa mediante a colocación de pranchas de material axeitado que cubran todo o espazo que vaia ocupar a instalación autorizada.

DISPOSICIÓN 5ª.- LOCALIZACIÓN

As distintas actividades autorizadas só poderán situarse no espazo de uso público municipal que se especifique de forma concreta na correspondente autorización.

Fixaranse, con carácter xeral, como zonas idóneas para a súa localización as prazas e parques públicos, rúas peonís e paseos. Con carácter excepcional poderase autorizar a realización de actividades artísticas noutros espazos e vías públicas, logo de estudo e determinación da súa idoneidade.

NORMAS REGULADORAS DA REALIZACIÓN DE ACTIVIDADES ARTÍSTICAS NA VÍA PÚBLICA PROMOVIDAS POR PARTICULARES

En caso de autorizarse localizacións en zonas de tránsito peonil, estas deberán manterse libres de calquera obstáculo que poida afectar á libre circulación ou supoñer un risco para a seguridade dos viandantes. En ningún caso se poderá realizar abasto ningún de material con motivo das actividades autorizadas.

As localizacións adxudicaranse atendendo a criterios de seguridade, tráfico, circulación, saturación de zona ou calquera outro de interese público. A este respecto, a Xunta de Goberno establecerá anualmente un número máximo permitido de actividades por cada zona susceptible de autorización. Os casos de concorrencia resolveranse mediante a aplicación dos criterios recollidos na disposición 8ª estas normas.

De non se producir un novo acordo que modifique o número máximo de actividades por cada zona susceptible de autorización prorrogarase o adoptado o ano anterior.

As actividades non poderán desenvolverse en lugares que dificulten ou impidan os accesos ou saídas de emerxencia de edificios de uso público ou privado, nin de establecementos comerciais e industriais. Tampouco poderán afectar instalacións, servizos xerais ou a circulación peonil ou rodada.

DISPOSICIÓN 6ª.- PERSOAS AUTORIZADAS

A autorización municipal será persoal e limitase a un máximo de unha concesión por cada solicitante. Estará sometida á comprobación previa do cumprimento por parte do interesado dos requisitos legais esixidos para exercer a actividade, que deberá de acreditarse documentalmente xunto coa solicitude consonte o disposto no artigo seguinte destas normas.

DISPOSICIÓN 7ª.- SOLICITUDES: FORMA E PRAZO

Os interesados deberán presentar no Rexistro Xeral do Concello, ou por calquera outro medio dos previstos no artigo 38 da Lei 30/92, a solicitude de autorización consonte o modelo que se achega como anexo número 3 e nos prazos previstos no anexo 2 destas normas. Deberán facer constar os datos e a documentación que se indican a seguir:

- Actividade que se pretende realizar.
- Período para o que se solicita a ocupación.
- Horario.
- Superficie de ocupación prevista.
- Cando se trate de actividades pictóricas ou fotográficas, descrición da técnica empregada.
- Cando se trate de actividades musicais, indicación do estilo musical e do número de compoñentes, de ser o caso de grupos musicais.
- Cando se trate doutras actividades artísticas acompañarase unha memoria detallada da actividade que se pretende desenvolver.

- Determinación concreta do espazo solicitado. Para estes efectos, o interesado deberá indicar na instancia a súa prioridade entre as distintas opcións reflectidas nela, sinalando por orde de preferencia os espazos que considera do seu interese.

A solicitude deberá ir acompañada da seguinte documentación:

- Fotocopia do documento nacional de identidade en vigor (deberán presentarse os orixinais no Departamento de Ocupación de Vía Pública para compulsar a copia).

NORMAS REGULADORAS DA REALIZACIÓN DE ACTIVIDADES ARTÍSTICAS NA VÍA PÚBLICA PROMOVIDAS POR PARTICULARES

- No caso de persoas estranxeiras, fotocopia do pasaporte (se o período solicitado para o exercicio da actividade non excede do seu período de vixencia) ou, se é o caso, fotocopia do permiso de residencia ou da tarxeta de residente comunitario en vigor (deberán presentarse os orixinais no Departamento de Ocupación de Vía Pública para compulsar a copia).
- Seguro de responsabilidade civil xeral en vigor cando a actividade leve consigo a montaxe dunha estrutura ou instalación susceptible de producir algún risco.
- En caso de actividades pictóricas ou fotográficas: mostra orixinal dun traballo realizado polo solicitante, con medidas máximas de 60 x 40 cm., que será devolta ao finalizar o período de autorización.
- No caso de actividades musicais: memoria na que se expoña toda a información e documentación que se posúa sobre a actividade musical que se pretende realizar e que acredite un mínimo de coñecementos musicais: títulos e certificacións académicas, experiencia profesional contrastada, participación en certames musicais etc.
- En caso doutras actividades artísticas: memoria na que se expoña toda a información sobre a actividade que se vai realizar con descrición dos elementos que se utilizarán para o seu desenvolvemento, espazo necesario e, se posúe, documentación acreditativa da cualificación para realizala.

As solicitudes presentaranse dentro dos prazos previstos no anexo 2. No suposto de que se trate dunha actividade artística cuxa tramitación non estea sometida a autorización conxunta, a solicitude deberá presentarse cun mínimo de 10 días hábiles antes da data de inicio do período de ocupación solicitado.

Entenderanse excluídas do procedemento de autorización conxunta que periodicamente se execute para cada actividade das recollidas nestas normas, as solicitudes presentadas fóra dos prazos indicados no anexo 2 ou que non se acompañen da documentación requirida. Non obstante, logo de que cumpran o requisito ou acheguen o documento omitido, poderase outorgar unha autorización posterior se persistise a vacante para a situación solicitada de acordo co establecido na disposición oitava. Unha vez finalizado o prazo de presentación, exporase no taboleiro de anuncios do Concello a listaxe das solicitudes presentadas e admitidas para cada actividade e situación que se publicará asemade na páxina web municipal (www.santiagodecompostela.org).

DISPOSICIÓN 8ª.- NÚMERO DE POSTOS. VALORACIÓN DE PEDIMENTOS. ADXUDICACIÓNS DE POSTOS

1.- Co fin de preservar e garantir o uso común xeral do espazo público, estas normas establecen criterios restritivos para as autorizacións de uso común especial do dominio público, por iso, o número de autorizacións que se outorguen limitaranse respectando, en todo caso, o máximo permitido para cada situación ao abeiro do disposto do anexo 1.

En aplicación deste criterio restritivo, tamén se poderá limitar o número de postos que se vaian instalar en determinadas zonas para evitar a sobreesaturación do espazo público así como establecer condicións específicas relativas a distancias mínimas entre postos autorizados ou outras que se consideren necesarias para garantir o interese xeral.

Para estes efectos e co obxecto de regular un procedemento que someta aos oportunos criterios de selección e baremación a concesión das distintas autorizacións, outorgaranse periodicamente de forma conxunta, nun único acto para cada actividade, atendendo á súa natureza e durante o período máximo establecido no apartado segundo desta disposición, con suxeición aos prazos recollidos no anexo 2 destas normas.

2.- O período máximo autorizado para as distintas actividades artísticas será de tres meses.

NORMAS REGULADORAS DA REALIZACIÓN DE ACTIVIDADES ARTÍSTICAS NA VÍA PÚBLICA PROMOVIDAS POR PARTICULARES

3.- No suposto de que o número de solicitudes presentadas para cada localización que sinalaran a mesma como primeira opción exceda do número de actividades desa natureza previstas para esa zona, segundo o establecido no anexo 1 destas normas, establecerase unha orde de prelación de acordo coa proposta que a comisión técnica asesora formule á concellería delegada, unha vez valorada a pericia e cualificación profesional dos candidatos e en función da documentación achegada.

A comisión técnica asesora estará formada polos técnicos que o Concello designe para a devandita finalidade en función da súa cualificación profesional ou coñecemento sobre a materia.

Para determinar a orde de prelación tamén se terá en conta o posible incumprimento das condicións establecidas en resolucións anteriores que autorizasen a actividade, debidamente acreditados segundo denuncias derivadas de inspeccións municipais, ou a imposición de sancións polo incumprimento destas normas ou das condicións da autorización.

Entre os candidatos seleccionados, terán a consideración de adxudicatarios das distintas autorizacións aqueles peticionarios que obtiveran maior puntuación ata completar o número total de actividades que se poden realizar en cada zona. A listaxe publicarase no taboleiro de edictos do Concello e na páxina web municipal (www.santiagodecompostela.org).

DISPOSICIÓN 9ª.- OBRIGAS DOS ADXUDICATARIOS

A) OBRIGAS XERAIS

Os titulares adxudicatarios estarán obrigados ao efectivo cumprimento das seguintes normas:

- a) Ocupar o espazo adxudicado para o exercicio da actividade sen modificar a súa localización e sen exceder dos seus límites e executala nos termos autorizados.
- b) A estrutura da instalación auxiliar necesaria para o desenvolvemento da actividade, se é o caso, terá que estar de acordo cos requisitos técnicos fixados na autorización.
- c) Manter en perfecta orde e limpeza o espazo adxudicado, así como a parte da vía pública lindante con el, absténdose de depositar lixo ou desperdicios fóra dos lugares expresamente indicados para iso. Para tal efecto, cando sexa necesario, o interesado deberá dispoñer dun dispositivo estanco previsto de peche hermético e con bolsa impermeable.
- d) Finalizado o período de ocupación autorizado procederase a desmontar ou retirar as instalacións deixando en perfectas condicións de uso e limpeza o espazo autorizado.
- e) Nas actividades musicais non poderán utilizarse aparellos reprodutores de son, nin altafalantes, debendo aquelas actividades que o necesiten realizarse de viva voz ou cos instrumentos sen amplificación de son, salvo cando se trate de autorizacións para actuacións non periódicas de celebración puntual, con estrito cumprimento dos requisitos e condicións contidas na autorización correspondente. En todo caso, no que se refire á contaminación acústica, deberanse observar as limitacións que establece a Ordenanza municipal de emisión e recepción de ruidos, vibracións e condicións dos locais.
- f) Queda prohibida a utilización de animais, mesmo como compañía do artista, mentres se desenvolve a actividade, agás no caso de cans guías de invidentes.

NORMAS REGULADORAS DA REALIZACIÓN DE ACTIVIDADES ARTÍSTICAS NA VÍA PÚBLICA PROMOVIDAS POR PARTICULARES

h) Non se autorizarán actividades nas que interveñan menores da idade mínima prevista na normativa laboral vixente.

B) OBRIGAS ESPECÍFICAS

Ademais das indicadas, no apartado A, os titulares das autorizacións estarán obrigados ao estrito cumprimento das seguintes condicións:

B.1) Condicións de obrigada observancia para a realización de actividades musicais na vía pública

1. No espazo autorizado unicamente se poderá realizarse a actividade musical para a que se concedeu autorización. Queda expresamente prohibida, con carácter xeral, a utilización de aparellos reprodutores de son nin altosfalantes, debendo realizarse as actividades musicais de viva voz ou mediante os instrumentos musicais autorizados, sen amplificación.

2. Arbitraranse por parte do interesado as medidas necesarias para producir as menores molestias posibles aos veciños, controlando os niveis de ruído producidos polo exercicio da actividade autorizada. Para isto, deberán observarse estritamente as limitacións contidas na Ordenanza municipal de emisión e recepción de ruídos, vibracións e condicións dos locais.

3. A posible percepción lucrativa por parte do autorizado derivada do exercicio da actividade terá, en todo caso, de carácter voluntario por parte dos cidadáns que transiten pola vía pública e non se poderá esixir contraprestación económica ningunha aos transeúntes nin ao público en xeral. Non se permitirá a venda de música con ocasión do exercicio da actividade, calquera que sexa o tipo de soporte onde estea almacenada.

4. O período inicial de autorización non excederá de tres meses. Cando se solicite autorización por un período superior a sete días, será preciso sinalar, na correspondente instancia, varios espazos públicos

por orde de preferencia co obxecto de garantir a mobilidade destas actividades e evitar o seu estancamento na mesma zona. En calquera caso, a determinación de idoneidade de cada espazo para cada actividade musical estará sometida a criterios de oportunidade.

5. A autorización municipal concederase sen prexuízo da obtención doutros permisos procedentes e do cumprimento de determinados requisitos cando veñan esixidos polas disposicións que rexen na materia.

6. O horario permitido para o exercicio da actividade será desde as 10 horas ata as 22 horas. De xeito discrecional poderase ampliar este horario durante os venres e sábados e vésperas de festivo, así como nos meses de xuño, xullo, agosto. En calquera caso, a concreción do horario dependerá en cada suposto do espazo concreto solicitado e da súa incidencia acústica respecto ás vivendas máis próximas

7. Ao finalizar cada xornada, o espazo ocupado deberá quedar expedito e en perfectas condicións de uso e limpeza.

B.2) Condicións de obrigada observancia para a realización de actividades pictóricas ou fotográficas na vía pública

1. As actividades obxecto de autorización poderán consistir na elaboración de retratos artísticos mediante fotografía ou en traballos pictóricos consistentes na elaboración de caricaturas, paisaxes ou retratos, xa sexa sobre táboa, lámina, lenzo, tea, papel ou esmalte.

NORMAS REGULADORAS DA REALIZACIÓN DE ACTIVIDADES ARTÍSTICAS NA VÍA PÚBLICA PROMOVIDAS POR PARTICULARES

2. Queda expresamente prohibido o emprego no exercicio da actividade de aerosois ou calquera outro medio susceptible de provocar emisións ambientais.
3. No espazo autorizado unicamente poderá realizarse a actividade pictórica para a que se conceda autorización e terá que exercerse *in situ* por parte da persoa autorizada. Sen prexuízo do indicado, nese mesmo lugar público poderá dispoñerse unha pequena exposición da obra para que poida ser contemplada polos posibles usuarios, todo iso sen exceder do espazo máximo autorizado. A superficie autorizada non superará os 2 metros cadrados.
4. O horario permitido para o exercicio da actividade comprenderá dende as 10 horas ata as 23 horas, a excepción dos venres e sábados e nos meses de xuño, xullo, agosto e na primeira quincena de setembro, que se poderá prolongar ata a 1 da mañá.
5. Ao finalizar cada xornada, o espazo ocupado deberá quedar expedito e en perfectas condicións de uso e limpeza.
6. O mobiliario permitido para o exercicio desta actividade e exposición da obra estará composto como máximo por un cabalete, unha cadeira de loneta para ser utilizada polo artista, un tallo para os posibles usuarios e unha pequena mesa para a exposición da obra.

B.3) Condicións de obrigado cumprimento para realizar actividades de mimo, estatuas humanas etc., na vía pública

1. A actividade consistirá na manifestación artística dunha persoa individual, cando non leve consigo emisión de son de ningún tipo nin instalación de dispositivos ou elementos auxiliares, agás as bases ou peañas.
2. O horario permitido comprenderá desde as 10 ata as 23 horas, a excepción dos venres e sábados e nos meses de xuño, xullo, agosto e primeira quincena de setembro, que se poderá prolongar ata a 1 da mañá.
3. A posible percepción lucrativa por parte do autorizado derivada do exercicio da actividade será, en todo caso, de carácter voluntario por parte dos cidadáns que transiten pola vía pública. Non se poderá esixir contraprestación económica ningunha aos transeúntes nin ao público en xeral.
4. Ao finalizar cada xornada o espazo ocupado deberá quedar expedito e en perfectas condicións de uso e limpeza.

B.4) Condicións de obrigado cumprimento para realizar outras actividades artísticas na vía pública

Poderanse outorgar autorizacións para o exercicio de actividades artísticas de diversa índole distintas das anteriores cando non leven consigo a emisión de son nin supoñan a venda de artigos de calquera clase, atendendo á conveniencia e oportunidade de cada unha delas, e especialmente á saturación dos espazos propostos. En calquera caso, a execución destas actividades quedará sometida ao establecido na disposición 5ª destas normas. A posible percepción lucrativa por parte do autorizado derivada do exercicio da actividade será, en todo caso, de carácter voluntario por parte dos cidadáns que transiten pola vía pública.

DISPOSICIÓN 10ª.- RESPONSABILIDADE

Os titulares autorizados serán os únicos responsables dos danos que con motivo da instalación ou da actividade puidesen ocasionarse sobre persoas ou cousas. Cando con ocasión dos aproveitamentos se producisen danos no pavimento ou nas instalacións da vía pública, os beneficiarios estarán obrigados a reparalos ou a reintegrar a totalidade dos gastos de reconstrución e reparación que se produzan que serán, en todo caso, independentes dos dereitos liquidados polos aproveitamentos autorizados. Para estes efectos, cando o desenvolvemento da actividade

NORMAS REGULADORAS DA REALIZACIÓN DE ACTIVIDADES ARTÍSTICAS NA VÍA PÚBLICA PROMOVIDAS POR PARTICULARES

artística leve consigo a instalación de elementos que puidesen ser susceptibles de causar algún dano persoal ou material, esixírase estar en posesión de póliza de seguro de responsabilidade civil xeral a terceiros en vigor.

DISPOSICIÓN 11ª.- DENEGACIÓN DE SOLICITUDES

Serán causas de denegación da solicitude presentada, sen prexuízo dos procedementos sancionadores que, se é o caso, se incoen en aplicación da ordenanza reguladora, as que seguen:

- a) Non acreditar os requisitos esixidos na disposición oitava destas normas, imprescindibles para outorgar posto e autorizar o exercicio da actividade.
- b) Reiteración de deficiencias sanitarias ou de seguridade así como incumprimento das demais condicións establecidas en anteriores resolucións municipais de autorización, constatadas nas inspeccións efectuadas.
- c) Non instalar o posto sen causa xustificada.
- d) Ser sancionado no ano do outorgamento da autorización ou no inmediato anterior por algunha infracción cualificada de grave ou por dúas infraccións leves, tipificadas na Ordenanza municipal de actividades, instalacións e ocupación da vía pública ou na Ordenanza de convivencia, residuos e limpeza viaria.

DISPOSICIÓN 12ª.- REVOGACIÓN

As autorizacións reguladas nestas normas poderán ser revogadas unilateralmente pola Administración Municipal en calquera momento por razón de interese público, sen xerar dereito a indemnización, cando resulten incompatibles coas condicións xerais aprobadas con posterioridade, produzan danos no dominio público, impidan a súa utilización para actividades de maior interese público ou menoscaben o uso xeral do espazo autorizado.

Ademais serán causas de revogación da autorización outorgada, as seguintes:

- a) Comprobación de falsidade nos documentos achegados.
- b) Incumprimento do disposto nestas normas.
- c) A comisión de infraccións tipificadas como graves na Ordenanza municipal de actividades, instalacións e ocupación da vía pública ou na Ordenanza de convivencia, residuos e limpeza viaria, sen prexuízo das sancións previstas nelas.

DISPOSICIÓN 13ª.- FACULTADES DA POLICÍA LOCAL

A Policía Local quedará facultada para intervir os produtos obxecto de venda, precintar ou retirar as instalacións non autorizadas ou que incumpran os termos da autorización outorgada, así como os instrumentos empregados no exercicio de actividades non autorizadas, logo de redactar a oportuna acta ou informe de inspección. Tamén estarán facultada para adoptar calquera medida que considere oportuna por razóns de seguridade e orde pública.

O material incautado depositarase nas dependencias da Policía Local ou, se é o caso, no almacén municipal e poderá ser recuperado polos seus propietarios nas condicións que acorde a Administración Municipal.

NORMAS REGULADORAS DA REALIZACIÓN DE ACTIVIDADES ARTÍSTICAS NA VÍA PÚBLICA PROMOVIDAS POR PARTICULARES

ANEXO 1

NÚMERO DE POSTOS PREVISTOS EN CADA UN DOS ESPAZOS PÚBLICOS PARA DESEMPEÑAR AS DISTINTAS ACTIVIDADES ARTÍSTICAS SUSCEPTIBLES DE AUTORIZACIÓN

Serán susceptible de autorización para o exercicio destas actividades calquera vía ou parque público, logo de valoración por parte da concellaría competente sobre a súa conveniencia e oportunidade, atendendo tanto ás circunstancias e méritos do interesado como ao posible interese público ou previsible trastorno que a súa realización puidese ocasionar aos veciños e cidadáns en xeral. Non obstante, establécense como lugares especialmente idóneos para o seu desenvolvemento os que se relacionan a seguir, sen prexuízo da posibilidade de que se autoricen outros por pedimento dos interesados. Con carácter xeral, aplicable a todas as actividades artísticas, o número máximo de autorizacións simultáneas por rúa, praza ou parque será de tres; non obstante, nalgúns supostos limitarase o número máximo de autorizacións, como se indica a continuación:

Actuacións de mimos, estatuas viventes e similares:

- Praza do Obradoiro (entrada pola rúa de Fonseca)
- Praza de Cervantes
- Praza da Inmaculada
- Parque da Alameda
- Avenida de Xoán XXIII

Actuacións de músicos (coas limitacións previstas nestas ordenanza):

- Praza do Obradoiro (entrada pola rúa de Fonseca)
- Praza de Cervantes
- Praza da Inmaculada
- Parque da Alameda (fronte ao Instituto Rosalía de Castro o número máximo de actuacións simultáneas será de tres. Exceptúase esta zona nas Festas da Ascensión e o Apóstolo. Non se establece limitación para as restantes zonas do parque).
- Rúa do Vilar
- Avenida de Xoán XXIII
- Limitarase o número de gaiteiros, que será como máximo de un en cada unha das zonas relacionadas.

Actuacións de pintores ou outras actividades artísticas similares:

Ademais das localizacións sinaladas anteriormente, poderán autorizarse tamén nos soportais de Correos. O numero máximo de artistas que poderán ocupar o espazo de xeito simultáneo será de 8.

ANEXO 2.-

PRAZOS PARA A TRAMITACIÓN DAS AUTORIZACIÓNS RELATIVAS ÁS DISTINTAS ACTIVIDADES ARTÍSTICAS

Datas para o primeiro trimestre (xaneiro, febreiro e marzo):

* Finalización do prazo de presentación de instancias: 3 de decembro ou o día hábil seguinte

* Exposición da lista de solicitudes admitidas e de adxudicacións provisionais: 10 de decembro.

**NORMAS REGULADORAS DA REALIZACIÓN DE ACTIVIDADES ARTÍSTICAS
NA VÍA PÚBLICA PROMOVIDAS POR PARTICULARES**

* Exposición de lista de adxudicacións definitivas: 20 de decembro.

Datas para o segundo trimestre (abril, maio e xuño):

- * Finalización do prazo de presentación de instancias: 3 de marzo ou o día seguinte hábil.
- * Exposición da lista de solicitudes admitidas e de adxudicacións provisionais: 18 de marzo.
- * Exposición da lista de adxudicacións definitivas: 20 de marzo.

Datas para o terceiro trimestre (xullo, agosto e setembro):

- * Finalización do prazo de presentación de instancias: 3 de xuño ou o día hábil seguinte.
- * Exposición da lista de solicitudes admitidas e de adxudicacións provisionais: 14 de xuño.
- * Exposición da lista de adxudicacións definitivas: o 20 de xuño

Datas para o cuarto trimestre (outubro, novembro e decembro):

- * Finalización do prazo de presentación de instancias: 3 de setembro ou o día hábil seguinte
- * Exposición da lista de solicitudes admitidas e de adxudicacións provisionais: 16 de setembro.
- * Exposición da lista de adxudicacións definitivas: 20 de setembro.